

全
浙
詩
話

全浙詩話卷四十一

會稽陶元藻篁村輯

男

廷珍

編次

廷琬

仁和朱文藻映清

參訂

同邑宗聖垣芥颿

國朝

王家賓

家賓字心一東陽人

金華詩錄 心一讀漢書云學如董相方希孟才到長

沙且弔原亦工整

徐介

介字孝先又字堅石號狷菴仁和諸生有集杜

詩

國朝兩浙詩鈔 孝先又名曠短小精悍而吐音清遠
操甚孤潔終身以麻布巾冠其首魏禧死真州走千里
哭之手鈔其遺稿所著有山中漫興一詩云尋山不期
深入山不期返願作山中人白雲時近遙

許尚質

尚質字幼文會稽人諸生著有釀川集

越風

幼文憶昌園梅花云看花條憶舊昌園
粉殘

香易斷竟有客到來迷屐齒無人知處漲溪痕平橋十里天如水僧磬三更月在門慚愧半生多旅食好餐冰雪渡朝昏嚴海珊梅花詩自入山來皆雪意寂無人處有煙痕殘笛一聲涼在水遠峯數點碧於煙與此同一不粘不脫之妙勝於高青邱遠矣

胡介

介字彥遠錢塘人有旅堂詩集

漁洋詩話 胡彥遠布衣食貧而妻與女皆能詩順治中遊京師送人南歸云帆檣楚國羣鳥晚橘袖吳天一雁晴與淮陰邱曙戒季貞兄弟善

國朝兩浙詩鈔 彥遠抗節自尚讀書好古詩能開闢
生回

姚文虞

文虞字德善號舜荇仁和人

湖墅詩鈔 姚舜荇當乙酉後泉石自甘踪跡頗類徐
狷菴書善懷素體所爲詩全集被焚今錄其巢雲牡丹
一詩云簇簇紅妝衣錦霞西冷金谷自繁華主人刮目
非逾分一笑春風甲萬花

張杉

杉字南士山陰人著有鑒寶山房集

西河詩話 張南士仿王建宮詞百首有云牆邊漿婦
漱花綺廊下酒家銜酪紅註云漿家房在皇城外卽浣
衣局也御酒坊後牆有街曰長連又一街曰短連總曰
廊下家答應長隨多住此賣酒京師稱廊下內酒家相
傳武宗曾遣官人雜扮爐婦親貰酒歇宿卽此予入郡
赴蘭亭集有於集次取李白詩比南士張杉南士赧然
不之答其人旣去座客謂南士李杜猶不足比耶南士
曰君自誤稱耳李安足與杜齒杜之籬籬李未能窺及
况堂奧乎若言杜則吾豈敢不惟吾不敢唐以後至今
堆垛若吾輩千萬人皆不及也李與杜相去何許而君

稱李杜誤矣天下有兩宛稱詩人稱李杜才人稱瑜亮
甚有抑瑜而揚亮者冤乎因朗吟曰我生若在開元日
爭許人稱李翰林時聞者皆咋舌去越數日兩耳籍籍
誚南士者踵至且有撫所吟二句揶揄南士者按此二
句係許昌薛尚書寄符郎中詩也南士嘗曰白詩原有
佳處但勝於任華馬異一流而公然與子美齊名且間
舉其價在曹劉鮑謝之間豈有此理蓋當時吾郡早有
效白詩以詬杜者南士此言有爲耳

董 暘

暘字无休會稽人

越風 无休寶月臺詩云孤臣此地幾兵戈剩水殘山
近若何誰唱滿江紅一闌斜陽低處晚霞多暮山萬疊
翠煙含此夕登臨意渺然兀坐四更方吐月有人松下
喚漁船景極尋常寫來別開生面知詩人所貴用筆不
必刻意求新

俞 熹

熹字日絲秀水人

國朝兩浙詩鈔 永俗嘗以二月祀灰七姑卽紫姑之
遺也俞日絲有灰七姑詞云紅繒張筍簀斜插海棠杏
竈前屏來竈下請小婦薦清茶中婦陳白餅大婦拜致

詞燭花弄鬢影種秔種秫須多收養蠶新絲十倍抽不
願生兒近王侯但願蕃息滋羊牛小姑靈感識人意髩
箸重重書作字符箕頻動小姑迴瓦缶香爐柏子灰稚
男收入棗栗去門前簫鼓喧春雷

駱復旦

復旦字叔夜諸暨人明經官縣尹

越風 叔夜送周無文歸里云明日扁舟是故鄉灌城
煙雨正微茫山人偶命參軍屐才子終羞入洛裝黃葉
夜封梅福里青溪夢繞贊公房知君西望頻回首桐烏
花源約未忘懷湯宮若云煙雨江亭濁酒傾荒林雜樹

鷓鴣鳴青山無處尋行跡零落飛花滿故城鄉先輩近
體詩總不落宋元以下最上沈雄次亦清遠我思古人
實獲我心

韓繹祖

繹祖字茂詒號止菴烏程人敬長子純玉兄有
詠性堂遺稿

國朝兩浙詩鈔 詠性堂遺稿叙畧云止菴公家學譬
之於河星宿之源旣白深遠時方舞勺日熒熒如曙星
神觀映人早負倍年之覺卽以奇英特達受知通人且
讀等身書語妙天下雖家世貴胄而辛酸鹹苦積匯於

胸臆恨不一吐以盡而口材若甌不能卽快意以出則
往往寄之筆楮間曾在史閣部幕後乃飄泊江湖集中
有揚州哭史督輔老師墓詩云權臣內擅外強藩來往
江淮一旅屯馬革空留酣義骨龍髯追從鑒忠魂運移
諸葛終無效力盡睢陽又絕援夢裏旌旗催北渡孤墳
何不葬中原

韓純玉

純玉字子遠繹祖弟有遠廬詩

國朝兩浙詩鈔 韓子遠有遠廬寤歌云卜築誅茅此
地偏吳山越水小窗前但看白日如過隙誰爲蒼生解

倒懸漢代威儀仍似舊劉家雞犬盡成仙
重風昨夜來巖竇莫放桃花引釣船此亦乾坤一草亭
松濤花雨滿窗櫺人如不飲虛三雅天旣無言有六經
操罷荷蘭還自和吟成梁父待誰聽厓前日月頻來往
嘆息年光若建瓴放開眼界作天游日日扶筇到上頭
平遠山川皆入畫高寒雲物已先秋年來莫下新亭淚
事去空懷杞國憂一自逃虛長寂寂何須洗耳學巢由
幾年身世隔滄波空谷寥寥任歡歌屐底烟霞隨處好
琴中山水向誰多纔過春雨寒芳杜欲動商飈帶女蘿
補葺一巢聊自寄漢宮秋色近如何

文藻按爾雅集中有閨中梅花盛開月下懸燈共賞
同內人賦詩云玉樹亭亭傍石闌銀燈閃閃映冰丸
爲因風雨凌寒後不惜殷勤倚醉看笑語漸聞花爛
漫家庭長與月圓游仙卽在人間世夢入羅浮未
是難据此知子建之配亦能詩但
不知其姓氏并詩亦無從考矣

來菴

菴字成夫蕭山人

西河合集 菴爲詩古文詞始以博大自喜好爲瑰奇
個儻之語已又力追先秦崇尚奧衍有似沙集藏於家
國朝兩浙詩鈔 來氏族中地大落鄙其軒冕獨居貧
乏每行游書筆自攜納滿袖纍纍若五石瓠遇故人當
意拱揖避道左語不當意去嘗與其徒縱談古今興廢

得失乃漢魏以來理學藝文人物徹三晝夜及過軒冕
與不當意人雖終日不出一語問之亦不對以故值蕃
者多卜其語默以視臧否幼精六書爲文雄博頡鵉生
平好立名節每道東漢人物蓋以自況

姜 梗

梗字鐵夫號桐柏會稽人有曹山草堂飯犢居
等集

國朝兩浙詩鈔 鐵夫負經濟喜交游集中有相府蓮
一篇可以想見其爲人詩云涿水映蓮華馬蹄不動路
平沙白壁堂開丞相家重門不啟啼早鴉門前人來掃

曙霞隱隱軋軋駐羽車
嗒嗒鼓吏鼓三槌望塵羅拜登
仙槎嗚呼大丈夫生不五鼎烹
死當五鼎食性豈徒勞
州郡職仰面從人借顏色君不
見范睢一言傾蔡澤富
自取非人力平生所輕程不識

詩衡 青山吟鮑謝紅燭寫莊騷
余鄉姜鐵夫梗之句
王漁洋極賞之

譚宗

宗字公子餘姚人

國朝詩話 餘姚譚公子宗落拓不羈
善音律嘗於維揚酒樓唱西樓錯
夢極宛轉俄有人起自鄰座摘其
中

其字猶未穩切負氣不相下繼詢其人卽譜曲之袁獮
庵也遂相與登西樓訪穆素徽時素徽已白髮矣詩載
倪繼宗續姚江逸詩如采石磯夜泊起數語云得名縱
有數發生自奇特下臨水蕭蕭上欲翠滴滴縱不遇謫
仙亦必傳此石翻案有致

按兩浙詩鈔云公子曾客揚州飲李寅家值俗客至
徙坐面壁待其人去方入坐善書不如其意雖厚幣
亦却則其品高而
性高可察見云

周炳曾

炳曾字子固號一山山陰人諸生著有南孺集
越風 南孺贈潛庵增註東坡海外集云窮髮之南一

角蝸文章豈少沒鷗波玉堂手自天邊落金石篇於海
外多秋水何人同向秀德雲再世卽東坡魚蟲註解渾
閒事山水情懷並不磨南嬉詩多奇僻此首竟體秀朗
亦復細膩熨貼殊有雅度

董道權

道權字秦雄號巽子鄆縣人有缶堂詩集

鄆縣志 董巽子嘗欲客并州有雪中答李杲堂詩云
鄆陵孝廉重然諾約我今秋醉桑落先人有友官并州
我欲從之客雁邱高堂有母缺甘旨負米何辭數千里
杲堂李子憂我閉門饑欲死告以遠行爲色喜酌我黃

金罍贈我青銅錢低徊不忍別此別須經年袖君之錢
醉君酒城東城北頻回首歸來兒女候柴門笑指餅中
不盈斗牽衣問我欲何之今年豐熟仍苦饑爺未出門
共歸語爺既出門啼向誰示兒袖中錢故人佐行李移
與易米薪且以救妻子量米數薪堪作數日食買舟無
資行不得他日仍登李子堂李子爲我作歌聲蒼涼曳
履依然守蓬華得酒且與傾壺觴昨夜雪花如掌大草
閣嚴寒只僵卧午餘日色照西窗起把君詩讀幾過窗
前冰雪消有時惟有故人顏色長相思

姜 諫

諫字問忠會稽人

越風 問忠有紀夢詩云鄉書半載不曾傳夢到耶溪
放釣船却向杜鵑聲裏覺一窗殘月照孤眠從唐人杜
鵑枝上月三更一語脫化不嫌其襲

徐咸清

咸清字仲山上虞人居會稽之稽山

紹興府志 咸清生而慧一歲識字五歲通一經甫蓄
髮以官監生應鄉舉有文名長娶冢宰商周祚女女亦
能詩乃就稽山開廣庭構藥欄設長筵發所藏書散棗
之對坐縱觀暇則抽牘各爲詩如有年

葉天樂

天樂甬東人

西河詩話 甬東葉天樂有宮詞四首皆明季遺事同
郡陳鄴仙嘗刻之不得其解其一曰春風冉冉入乾清
武庫芒銷太乙兵西水橋邊冰水泮北花河畔草先生
鐸針枝個頌公府抹布刀兒賜御營不道朝回無一事
公卿倚醉只聽鶯按西內太液池王河橋下長至冰合
競作木床牽渡冰上如飛謂之拖床世廟晚年以修真
多居西內嘉靖壬寅正月十六日皇太子自宮中往觀
以拖床渡閣臣夏言詩云胡床穩坐渡層冰是也鐸針

插宮帽中者其製用珍珠珊瑚金銀方勝等應時作彩如元宵作花燈中秋作桂兔類第單插一枝居帽中若枝個則兩旁對插矣又有挑杖以應時所製珍珠等使鐙端下垂如流蘇然世廟間以二物賜輔臣萬歷初內閣張居正嘗服所賜以爲榮抹布刀兒卽直房內官腰條牌總中懸挂侍候所稱一把連者其二曰寶和六店裕軍儲烈鳳烹龍日所須金字牌傳內史座銀苗盤出大官厨綵棚花賞三三月錦炭寒銷九九圖盡說太平方有象衣冠前殿習山呼按寶和六店宮中儲材物處一寶和二和遠三順寧四福德五福吉六寶延武宗嘗

粉商賈與六店貿易爭忿喧詬旣罷就宿廊下卽此六
月伏日宮中進銀苗菜卽新藕秧也冬至後詔司馬監
劄印九九銷寒詩圖每九詩詩各四首皆俚語如鼓子
詞類其三曰荷藥潭香捧御盃每朝祝聖響於雷節宜
蝙蝠穿花至人向琉璃祭水回金殿編龍錢作串玉關
走馬彩成堆豈知萬歲山頭鹿一望空中盡日哀按萬
壽節官帽鐸針上有洪福齊天諸彩所謂洪福齊天者
先製齊天字以紅色蝙蝠綴兩旁是也其四曰菩提珠
樹九蓮堂繼作堆紗佛面光柏子賜名秋露白菊花宣
號御袍黃鬪鷄局散春風香邀兔筵開夜月涼愁裏不

堪思往事華胥一夢最荒唐按九蓮事別見

蔣宏任

宏任字擔斯餘姚人著有來雨軒稿

山居詩話 半山道中余有五律擔斯見次云吟罷風
出樹戲鴨浪成花又送予還遁野云收拾烟嵐籠短袖
滿裝詩句壓空船又柬許慕迂臺閣風流歸伴鶴山林
月旦祇評花輓節孝胡母云迴腸似之永愁緒寫心香
人間烟雨幻松柏自蒼蒼何等高老予在來雨軒二載
擔斯始學詩便如此可敬也 來雨軒稿余館硤時所
點定如功名風外絮骨肉夢中人關河疎舊友風雨斷

歸人皆沈鬱又無竹可刪剛剩此有鵝許換或籠之贈
王受明妙在切姓而無迹日烘山黛綠風洗樹痕青句
聽楓葉落茶罷菊花秋又答僧云風力正酣回海燕片
雲不曉誤鄰雞殘書酣飽蝨獨影若吟秋見懷云高人
骨格風霜在薄俗炎涼草木知紅梅云不知丹骨何時
換直使冰心對客羞暗薰詩夢醒清偈酒魔來燈蕊剔
殘幽結夢嶺梅飄盡冷同心弔孤山云日落兩峯雲起
處月明獨鶴夜歸時贈友云細雨翦桑纔繭後晚霞烘
樹撲螢天觀潮云信無逾子午功可溯辛壬山行云山
水遺藍本吟哦得素秋簾密亂篩晴月細棟高閒看曙

雲忙秋燕云戲蹴壞絃憐絕響故穿疎柳尚多情打疊
離愁雙翦在淚痕空剩舞時衣休言戊己知趨避只爲
聰明恨轉長何等工艷

陸繁昭

繁昭字拒石錢塘布衣

國朝兩浙詩鈔 拒石爲文最敏有六朝風韻其詩有
金沙灘一首云步履金沙渡朝陽出翠微鹿眠芳草石
人上釣魚磯松子山僧飯蓮花處士衣林泉雖可樂吾
意敢忘機

吳崇提

崇提字伯憇山陰人諸生著有雪舫詩集

越風 伯憇秋杪席上送李磐石詩云解纜江城九月
天開尊重話烈皇年玉龍已逐蒼梧月石馬空嘶泰時
煙兵柄一時歸四鎖羽書萬里急三邊虛聞赤伏留符
記風雪誰將漢節懸中四句承上慷慨激昂爲雪舫變
調可與陳迦陵秋色蒼茫上佩刀一篇並傳

郭襄圖

襄圖字皋旭號匡山平湖人有更生集

櫓李詩繫 匡山自壯至老奔走四方久而無所遇曹
秋岳贈詩曰苦吟經戰伐短褐老乾坤其風味可知矣

國朝兩浙詩鈔 皋旭嘗贈鮑子韶卽送別詩云看君
心事欲凌雲客裏悲歌日易曠每笑成名皆豎子翻因
長揖重將軍焦桐未盡留知己白鳳時吞只賣文憶向
五羊同叱石燕臺相見又離羣

朱爾邁

爾邁字人遠海寧人嘉徵子有平山堂稿

國朝兩浙詩鈔 人遠嘗在蜀所作多蜀中詩今錄其
巫山曲一篇云巫山一何盤盤東南初日團圞照我綠
波增瀾盈盈彼美雲端彼美塞嘿無言玉窗金屋晨閒
乍迴舞袖驚鸞欲捲珠簾未前似與細腰爭妍宮女如

花可憐楚王午夢未還陽臺雲雨猶懸珀枕牙床儼然
風流一散如烟臨風寂寞朱顏與君相隔各天與君相
思淚斑不及巫山連綿霞裳霧縠烟鬟朝朝暮暮情牽
參差極浦芳蘭折得瓊枝露鮮脈脈高唐觀邊微波通
辭倍難巫山之曲空傳興懷彼美嬋娟惜此春風盛年

宋 俊

俊字長白山陰人諸生著有岸舫集

越風 翁爲西洲之父學博才瞻詩有家數律勝於古
春日謁大禹陵詩云圖畫天開海甸環夏王祠畔水潺
潺元圭錫命歸何處翠輦時巡竟不還每讀遺謨驚淦

洞永懷明德對青山春風縹緲靈旗動疑是神遊澤國
間又無餘廟祀歷綿綿拜手先王玉座前花鳥共沾新
雨露人民誰識舊山川書傳蒼水來何日舟負黃龍去
幾年欲倩巨靈開嶂峽橫分三十六青蓮命意莊凝遣
詞風雅謁禹陵詩應如此作次章落句硬語盤空其峽
江舟次望仙女峯云輕帆一點鏡中行黛壑丹崖畫不
成三十六峯雲影外不知何處步虛聲則又與三十六
宮春似海不知何處月明多同一唐音矣

魏學渠

學渠字子存號青城嘉善人順治戊子舉人官

至湖西道著有青城山人集

構李詩繫 學渠慷慨好施桐城錢澄之感其惠有詩
曰還家擬過懷青閣從此饑驅不出門玉林汪繼昌以
所贈築園江干名曰魏圃黃宗炎求買山之助出紙襍
置其袖視之則黃金一餅也他率類是

王庭

庭字言遠一字邁人嘉興人順治己丑進士累
官江西南西布政使有秋閒詩三仕二西諸草
山西通志 庭制義堅凝峭刻自成一家古詩出入陶
韋律得杜法晚乃汎濫唐宋諸家

文藻按二西草有棧道中作詩云人行山上高天在
山中小員暉易沈夜初陽遲報曉馬走山樹巔飛鳥
出其下雲連深洞迷石缺危橋架七盤非險途三秋
足清景日夕流泉聲誰能辨喧靜摹寫棧道可謂盡
其槩矣

張潔堂

潔堂字清可仁和諸生

湖墅詩鈔 仁和鄒象鼎字符九順治己丑進士授廣
東布政參議備兵羅定時粵寇未靖欲以計平之兵敗
被縛不屈死事聞贈光祿正卿張清可有詩云讀書三
十載宦達甫兩週寢食未及穩風波從此迥直因封疆
故寧忍家室謀臣命盡賊手兒軀傍父投古今傷心事

同里涕泗流復有愼公族殉難委山陬死陪鋒刃席覓俱骨肉儔出土誠離異今當返故邱

吳雯清

雯清字方漣號魚山仁和人順治壬辰進士官

御史有雪嘯軒集

白鳥紀事 吳方漣御史有先壠在歙西新安山葬百餘年無達者葬師皆曰不宜貴人然壠上多長松望之鬱然辛卯春白鳥數百忽集松上狀類鷺而小或曰雀也松頂若積雪鄉老以爲不祥童子每持竿驅之人或仰投石擊松枝折終不去益多是秋方漣試浙江中式

名
明年成進士於是人皆曰白鳥祥而葬師更盛稱是壙
爲吉壤及方漣司李西粵白鳥漸散去人私相謂五嶺
瘴癘地司李君恐不生還耶庚子春白鳥又大集未幾
方漣以卓異取御史

國朝兩浙詩鈔 魚山嘗入法華山夜宿石人塢有詩
云散步入深林山山作秋暮幽徑別孤筇蒼翠自成雨
籬落煙火微樵斧響前路徘徊桑畝間閒閒得吾素竹
逕通僧扉古木自盤互明月空谷中石人影相顧

曹爾堪

爾堪字子顧一字顧菴嘉善人曹勛子順治壬

辰進士改庶吉士授編修累官侍講學士有杜鵑亭集南溪集

檣李詩繫 爾堪性强記諸瑣屑事能舉其原委人一見輒不忘若輿圖要害山川形勢指畫纖悉聽者神聳罷官歸偕二三老友選勝賦詩與宋琬施潤章沈荃王士正王士祿汪琬陳可則稱海內八家有南溪集行世金漸皋

漸皋字夢蜚仁和人順治壬辰進士官漢陽知縣有怡安堂集

國朝詩選錄 怡安身任劇邑大吏方以才能薦而顧

然乞身其風高矣論詩謂泥古而拘趨今而襲總期抒
寫性情今披其集果如其言集中邗江一詩云畫舸南
遊錦纜移垂楊空有萬條垂二分明月仍今夕十里珠
簾異昔時回望鄉關迷咫尺頻年踪跡愧支離可憐楊
子橋邊水只與征人照鬢絲

國朝兩浙詩鈔 夢蜚有怡安堂集中有冬日雜咏一
詩云日日愁仍攬鏡看楚人憔悴尚南冠力微不任施
橫草論定終當待闔棺元亮晚途甘石隱孔明早歲本
龍蟠救時事業須經術莫遣蒼生笑謝安

胡文學

文學字道南甬東人順治壬辰進士官至監察

御史

甬上耆舊詩附述 先君有答杲堂記事二詩其一章
曰誰向生前識子期要從隔世叙相思愛奇肯負驚人
句嗜善偏尋走覓詞食蠧飽魚深可惜鏤金題玉轉無
奇昔賢留得靈光在踏斷荒崖拾得時其二章曰百年
寂寂少心知剩骨蒼茫有所思碧落也須傳好句黃壚
恨不答前詩殮多石髓當逢異魘遍芝苗定獲奇某在
千秋應一遇可知飯顆見君時讀二詩仰見先君與李
先生采錄心苦發先民之潛輝亦至矣

沈兆璉

兆璉字器先號鶴沙順治甲午舉人

湖墅詩鈔 沈鶴沙工書而立格高尚嘗作春日有感
詩云山麓性之近林泉心所欣投閒思放艇無計學耕
耘芳草生新綠莓苔映日曛更逢春色艷惠靄散輕雲
每抱登臨興時憂足不勤鳥啼添靜籟花落任繽紛
局戶親蘭氣清池玩石紋閒來書道德不肯換鵝羣

丁澎

澎字飛濤號藥園仁和人順治乙未進士官禮
部侍郎有扶荔堂集

扶蕩堂集序

張安茂撰

我友丁子飛濤弁冕乎西泠者也

其詩溫麗而含清雄桀而盡倫故述懷之思淵以平贈別之思慨以慷關塞之思勞以壯征人思婦之思憂以悲

十子詩選序

飛濤天性愉夷不耐搜剔染翰伸紙宛

爾妍好如合德入宮芳香充體以自然標勝 又曰飛

濤如黼黻初舉銀筵未闕月光通曙與燈競輝

感舊集

丁澎字飛濤號藥園仁和進士官禮部郎中

本事詩小序嚴瀨亭云祠部少時有白燕樓詩流傳吳下士女爭相採撫以書衫袖婺州吳賜如之器有句云

恨無十五雙鬟女教唱君家白燕樓爲一時傾倒如此
杭州府志 丁儀部彭咏蝶云愛爾飄揚意依人冉冉
飛高低惜芳草浩蕩弄春暉有夢長爲客無家尚憶歸
故園風物變楊柳未應稀五六羣歎神采柴紹炳獨楸
然曰飛濤少年登第風雲路濶忽作此酸楚語當非佳
祥已果被謫出塞外久之歸里故宅已售之他人百物
更變惟垂楊數株翳綠如舊

今世說 丁藥園與宋荔裳施愚山嚴瀨亭輩稱燕堂
七子名滿京師又藥園初官法曹時冊禮東官無詣典
禮者調入東省兼主客貢使至驛館廉知丁爲主客持

紫貂玉犀從吏人易其詩歸國謫居五載畧無怨狀躬耕自樂灑然有箕山之風

林士龍

士龍號錢水太平人香河知縣

三台詩錄 公有賊退呈郡伯高公詩云旄星夜落響江潮蜃霧彌空瘴未消應敵從容看賭墅行軍歡躍勝投醪登陴無事師皆笑飛炬緣知賊盡焦五馬勲名知不細海天歌頌遍漁樵此詩見高郡伯合台實蹟輿頌錄蓋康熙甲寅閩逆竊發東甌內叛台城幾失而獲全斬陽高公培守郡有備禦功也

顧豹文

豹文字季蔚錢塘人順治乙未進士由縣令擢御史

詩衡 今人學詩輒言少陵豈知才力不及總屬皮毛
季蔚旌功祠詩云君民禍亂身難委宗社安危帝自知
真得少陵神髓帝自知三字尤高渾絕倫

嚴允肇

允肇字修文歸安人順治戊戌進士官壽光知
縣有石樵詩稿宜雅堂集

國朝詩錄 石樵以同官累去官後與同官遇益厚禮

之人服其長者詩古今體兼善龔尚書謂其春容大雅近代作者亦不多見蓋不妄許云

馮 甦

甦字再來號蒿菴臨海人順治戊戌進士歷官刑部侍郎

三台詩錄 康熙己未 殿試少司寇充讀卷官竣事上賜茶乾清宮命與少宰張繡紫少馬孫忭庭等各賦詩少司寇詩先就有還看景運息戈鋌之句 上諭鋌字稍生少司寇伏奏云因杜甫有戈鋌明雪色語後人相沿押用 上復諭險韻排律用之不妨律詩似宜他

在湖詩集 卷五
擇卽面奏改定有鄒枚供視草還看房魏畫凌烟云云
上首肯稱善旣出同官盛傳誦施侍講愚山有句云受
詔近傳新句好親承 天寵與深論蓋指此也

毛際可

際可字會侯號鶴舫遂安人順治戊戌進士授
彰德府推官改固城令再補祥符尋以博學鴻
詞薦旣試罷歸

西河詩話 遂安鶴舫兄弟行而文譽相埒嘗從山
中寄予集唐一首極佳以余垂老住杭方註易也其詩
曰懶於街裏踏塵埃林下從留石上苔賢者是兄愚者

弟早潮纔落晚潮來門閒多有投詩客山翠遙添獻壽
盃講易自傳新註義懸知獨有子雲才

張璠

璠字峒一號須裘平湖人

櫺李詩繫璠祖正叔先生由鄉薦任海門令講學著
書惜其詩失傳年譜中載有喜聞新建新會餘干從祀
得吾道於今又麗天之句璠受業於張侗初才氣豪邁
有載石舫諸刻

葉封

封字井叔嘉興人順治己亥進士由登封令入

爲兵馬司指揮

見聞隨錄 井叔生平精於爾雅說文嘗以詩質王阮亭阮亭盡刪其舊作獨取其高山詩五六十篇爲嵩遊集序而刻之又選其己未庚申詩刻之列於十子中十子者宋牧仲挀王幼華又旦曹升亦貞吉顏修來光敏田霞綸雯于仞重輝丁鴈水煒曹頌嘉禾汪季舟懋麟并井叔也由是名益噪

陳達德

達德字大孚義烏人順治初年應 詔授遼陽令

吳賜如陳大孚傳 大孚平生好險索偶得卽記之累
累皆長吉錦囊中物也嘗爲余頌其得意之句如詠邊
云驚飈馬首搏沙去寒月烽邊點雁來然未見全篇聊
志之見超軼不凡之致

曹 溶

溶字潔躬號秋嶽秀水人崇正丁丑進士官御
史 國朝順治間歷副都御史戶部侍郎爲廣
東布政使左遷山西陽和道有靜惕堂詩文

攜李詩繫 溶肆力於文章尤工尺牘長牋短幅人共
寶之晚築室范蠡湖名曰倦圃 郭襄圖弱冠爲張西

銘文燈巖所賞三吳社集皆知名焉乙酉泛舟入海期
年歸一日殺其仇於市下獄賴友人脫自壯至老奔走
四方久而無所遇曹秋岳贈詩曰苦吟經戰伐短褐老
乾坤其風味可知矣晚年無子買妾居華橋竟死於吳
有更生集

本朝名家詩鈔小傳 曹溶字秋岳號倦圃少日卽以
詩名年事漸增風格日進體氣自然意匠深穩李天生
稱其五古如羚羊挂角無迹可尋而渾金璞玉中奕奕
自露神采又云意取其後詞取其自然所以復漢京也
調取其後逸格取其整所以明選體也而渾雄悲壯馳

驟兩唐者反在所畧又云七古向有獻吉如龍仲默如鳳之喻龍變化不測鳳文采斐然可謂深知何李者要之二體亦未能偏廢先生雙提並輓而行而奧衍宏深不顧時眼大有郊祀鼓吹之遺世無言漢詩者吾珍此自賞耳蓋其佩服若此至五七律之一氣渾成五七絕之正變互見其見稱於李秋錦陳其年潘稼堂鄧漢儀諸公尤未易更僕數世之爲詩不枕經腴史以盡其才月鍛季鍊以博其趣涵濡醞釀息深深而出疊疊徒取煩音軟語希世媚俗則讀靜惕堂集其廢然而知返也夫

相堂筆談 秋柳詩自王新城唱之而作者甚衆要當
以顧亭林曹倦圃二公爲最卽原唱亦不及也亭林作
云昔日金枝間白花只今搖落向天涯條空不繫長征
馬葉少難藏覓宿鴉老去桓公重出塞罷官陶令乍歸
家先王王座靈和殿淚灑西風夕日斜倦圃作云灞陵
原上百花殘隄樹無枝感萬端攀折竟隨賓御盡蕭疎
轉覺道途寒月斜樓角藏烏起霜落河橋駐馬看正值
使臣歸去日西風別淚望長安皆是詩中有人

嚴 沆

沆字子餐號顥亭餘杭人遷仁和官至戶部侍

郎有顥亭詩選北行日記

雲護齋詩話 吾鄉嚴顥亭湯西崖兩侍郎俱無畫名然嚴集中有田疑只索畫詩查編修敬業堂集查侍讀查浦詩鈔皆有題湯畫之作兩公兼擅繪事爲時輩推重惜殘縑斷紙流傳絕少故世無知之者

馮 喆

喆字孟膚號三有臨海人居天柱山中學者稱醒園先生

三台詩錄 甲寅閩寇僞都督曾養性僞將軍朱飛熊聞先生名獻千金先生閉門拒之二渠相戒勿犯里居

台南諸鄉遭屠戮鳳橋千餘家獨存故司寇馮蒿菴贈
詩德全患難方爲寶道濟鄉鄰未是窮之句卒年八十
餘有醒園集六卷名儒葉渚民先生諱崇震嘗縱評歷
昌啟正之間天時人事之故爲書數卷將卒以遺醒園
海鯨入境負藏山谷中丁酉九月初四夜焚山不敢救
爲祝融所收醒園深恨負托爰作泣史詩云公書成草
莽擬壽史歲鑄已秘名山貯何庸太乙燃灰飛驚鬼泣
煙滅致人憐成毀雖因數余心忍惔然

汪文栢

文栢字季青桐鄉人官指揮使著有柯廬餘習

國朝詩錄 竹垞朱先生序其詩謂非僅開宋元之奧
窔直造唐人之室而齊其裁不無溢美然謂時有佳句
比之孟山人之微雲淡河漢疎雨滴梧桐斯爲得之

按季青登煙雨樓詩鴈飛難辨空中字棹過惟聞暗
裏聲寫煙雨固佳然又不若盛湖詩夜燈千月練秋
雨半湖菱句尤神妙

陸次雲

次雲字雲士錢塘人官江陰知縣有澄江集

國朝詩話 于少保祠詩悲壯者甚多不免似岳忠武
可通用錢塘陸雲士次雲云不將北宋爲南宋翻藉新
君返故君乃鐵案也

按雲士題荆山石壁云寄語山靈聽嘯歌連城再別
嘆如何人間碧眼應難遇莫產瓊瑤誤卞和語婉而
悲

顧自俊

自俊字秀升號愚菴仁和諸生子泰交孝廉

湖墅詩鈔

顧愚菴賦性高潔嘗作古詩以見志曰鷺

羽抑何白鴉羽抑何烏受性旣迥別顏色亦大殊鷺不
與雀游鶴不入雞羣况乃垂天翼矯然超風雲種蘭兼
種蕙采薪不采桂孔雀雖多姿終非鸞鳥類何當駑馬
鞭用以策駢驥

滑許枚

許枚字夏占號定菴仁和歲貢生

湖墅詩鈔 滑定菴乃逸齋之弟工書能詩嘗作女耕
田行以紀苦節其詩云四座且勿喧聽我長歌女耕田
妾家無子姑亦老夫婿能養死復早薄田數畝舊所遺
耕耨無人半荒草族中子弟氣食人欲佔此田逐妾身
其人金多輔者衆佃戶逡巡不敢種老姑嗷嗷待朝餉
含羞出門親荷鋤可憐耕田腕無力安得將來觀秀實
未終半畝若不勝淚灑麻衣重歎息不難一死向九泉
念我老姑倚望柴門前誰家游女相擁簇滿頭翡翠雜
珠玉暖風吹衣香襲人道旁老幼目相屬妾容憔悴塵

土中野田幸免狂且辱但願耕田勞且安種得升斗先
了官自炊餘粒勸姑飽誓不將田與凶狡我聞其語心
傷悲天地大矣此事誠有之人生無良不畏天作事橫
肆何不然女耕田我長歌之君莫喧

滑吉登

吉登字誕先號匪菴仁和歲貢生

湖墅詩鈔

滑匪菴慷慨好施有露香亭別業日與北

墅諸前輩吟咏其間樂道不仕有題昭明寺詩云余本
幽棲人偶在招提徑叩門風淒淒俗慮泠然醒刻竹驚
棲鳥披襟攬危磴天空淡無雲日落烟初暝遠公託欣

賞孤琴發清聽共語覓無生燈燈了相證

朱之鵬

之鵬字元狎號莊菴仙居人順治中拔貢著有
誰思草

三台詩錄 莊菴淡於功名喜著述悼邑中文獻殘缺
輯安州詩遺數卷梓之何石湖寄詩有未老身先同六
逸低吟興不減三餘及懸琴自作閒遊贊憶友還貽論
隱書云云風度超逸可知矣

朱 慎

慎字其恭武義人選貢生

金華詩錄 宋元鼎云菊山工詩文溯源漢魏取則三唐每出一語不肯拾人牙慧毛會侯云清真雄肆兼襄陽少陵之長其恭與李梧岡交既卒梧岡輓之詩曰江東詩好誰如爾天上樓成只爲渠梧岡眼中無餘子所許必非常才也又云當年綠綺猶存否子敬人琴兩絕聲自注余曾以古琴贈其恭當日其恭必善彈琴詩亦非空言也

方士穎

士穎字伯陽淳安人有偶存詩六卷

浙江通志 士穎就外傳卽學爲詩研揣聲律天然獨

得顧不令父知也年十一就試歸父檢其行笈得詩一章中有句云野渡舟難覓沙汀客屢呼乃以手鈔杜詩一帙畀之於是益大爲詩士穎詩雅潤爲本遇象能解風流趣好論者謂不減中唐錢劉輩其長篇指事類情鋪陳終始如白公諷諭諸篇老嫗能解也以睦州詩派之無存也次第排纘爲嚴陵詩選以補續之甫成二十四卷而卒

高維成

維成字百雉嘉興諸生

攜李詩繫 百雉佳句有月色水鋪地鴈聲秋滿天蕭

然行李桃花渡何處佳人燕子樓爲時所稱

吳磨士

磨士字宏度海鹽布衣著有斲冰集

檣李詩繫 宏度世居海鹽澈州匿影湖上頽然窮老
有吾本蓬峯老布衣與世不合長掩扉之句

陳大捷

大捷字用泰號霞西臨海人

三台詩錄

霞西以嘗禍戍遼陽過萬花樓故址書一

絕云萬花樓外萬花開花下將軍醉幾回今日花殘人
亦去獨留橫石一枝梅後人爲擱筆歸里後劉憲史廷

璣見其旅壁詩親訪焉著有信口吹

陸嘉淑

嘉淑字冰修海寧人有辛齋遺稿

香祖筆記 海寧陸處士冰修嘉淑昔在京師與施愚
山潤章梅耦長庚每夕必過余邸不冠不襪縱談至夜
分始別去陸有絕句紀事云科跣到門衣不船船襟紉
蓋方言也若杜子美天子呼來不上船是紀實事冷齋
夜話以爲用方言則鑿矣

張之楚

之楚字幼青海鹽貢生有掃鴈齋詩鈔

橋李詩繫 幼青年少工詩太倉吳梅邨贈句云愛君
詩似謝宣城

袁揆燮

揆燮字岳咸號漁山嘉興人

橋李詩繫 漁山詩不苟作守其尊人丹六遺訓五古
必學漢魏律必盛唐惜合稿散失惟從雲山酬倡中節
錄數章而已

魏允枬

允枬字交讓平湖人著有維風集

橋李詩繫 柳州詩學之盛均奉枬爲主盟陳增新云

體合離騷義兼正變吾邑近來風氣日上實開其先李
煒亦云犬雞始明曜雲故途人倫之弁冕風雅之先驅
其推重如此

徐無爲

無爲字初鄰嘉興人布衣

攜李詩繫 初鄰以好客致貧爲時所稱查容有詩哭
之云療貧無藥病無資嚼蠟生涯死不辭葛帔練裙千
載恨忍看四歲此孤兒

韓雲

雲字自爲純玉次子有怡園詩鈔

國朝兩浙詩鈔

怡園詩鈔徐倬叙畧云按其前作惟

天台記游一卷餘皆不錄而所存者特遊台以後之詩
余詢之則曰某前生天台方廣寺僧也故所存自此始
余笑謂之曰子其爲蘇子瞻耶子瞻游杭州壽聖寺甫
入門恍見前生所經歷因謂其兩廡僧衆曰若輩悉吾
之舊徒也夫夙昔之因猶夢中境難窮所自自爲之前
生姑勿深論余竊怪其年方壯時詩中已多見道之語
豈其於性命之學果深造而有得耶而不知其夙因也
然則其詩之大雅而不羣也有以哉集中石梁觀瀑歌
云天台高高無上不與衆山同氣象接蒼昊之穹窿臨

溟渤之浩蕩其趾八百有餘里其巔一萬八千丈昌黎
華嶽險太白蜀道難吁嗟此地堪兼兩舉頭遙望插青
霄陡難置足徒神往徘徊林麓心茫然安得攀躋有路
達方廣瞥遇樵子來瓊臺指點直上金地銀地登崔嵬
望中括蒼雁蕩濛濛青數堆靈溪甌江淼淼白一杯苟
非乘雲而御風安能脫塵而離埃劉阮緣慳已歸去道
猷行淺且莫來

道猷尊者欲過石梁聞空中語曰今未得度却後十年來

我今到此

亦奇哉尋山翻若溯河源茫茫四顧動疑猜耳中有聲
忽轟動胡然空谷殷其雷咄咄怪哉石梁將至反無路
曇花一朵倚雲開危亭嵌空縣厓腋突兀虛窗巨鼇脊

巨靈運掌劈兩巖凌空故作狡獪連其脈奔流本自九天來倒卷掀騰疑地坼響震龍門隘口霆勢翻宿海波心汐梁飛身而跨瀑恍長鯨之汲水瀑并力而爭梁勝怒猊之抉石忽然幻成雙軸綃龍女冰梭不停擲七襄無此巧匹練無此白萬玉噴珠璣一片玉千尺瀉入澄潭中瓣瓣蓮花碧竭來欲上若登天對此驚心動竄鼉忽聞古寺一聲鐘夙因猛省心惶忪老僧款我宿舊侶若重逢維時正初夏氣候如嚴冬夢中乍驚風雨驟醒看旭日光熊熊嗚呼來者無終窮去者若弩矢此中隔斷人間世匿跡深山那得死山高高兮渺愁思水滔滔

兮無盡時下坡坂兮步遲遲雲無心兮向何處花流出
兮將安之下山如謫塵凡去重續仙源杳莫期

全浙詩話卷四十一終

全浙詩話卷四十二

會稽陶元藻篁村輯

男

廷珍

編次

廷琬

仁和朱文藻映濬

參訂

同邑宗聖垣芥颿

國朝

祁駿佳

駿佳字季超山陰人

國朝兩浙詩鈔 駿佳以有道之士稱於時而頗嗜奇
其詩有秋日送顧茂倫一絕云胥江九月鯉魚風有客

乘潮下浙東家傍三高祠下住到門楓葉恰新紅

陸澹庵

澹庵字未菴平湖人有六愚詩集

國朝兩浙詩鈔 未菴與王農山朱竹垞游乃義山閣
學之父其詩有宜興鹽古一篇云陽羨山遙策杖堪書
生安在剡鶴擔逢人盡說張公洞問景還推玉女潭大
小汎連吹浪濶龔時壺起鬪茶酣斬蛟橋畔閒憑弔生
氣千秋一偉男自注云汎河名也東西水關外卽是龔
春宏治間尚書吳儼僕也治壺爲時大彬師貴不易得

諸壁發

璧發字楚貞仁和人虎男長子有硯香齋詩集

硯香齋詩集序

毛際可撰

余友諸子虎男與兄駿男以詩

名西泠幾有機雲之目其長子楚貞少嘗執贄於予方
在舞象時辛巳春偶遊白下楚貞以詩見質已裒然成
集問其年則竟逾三十年慨流光之易逝不禁掩卷太
息徐篝燈讀之神姿雋婉如石上清泉春初新柳至其
食貧四方感慨歷落則又如俊鶻之乘風而擊寒蜚之
咽露而悲蟄蚊之聞雷而怒技至此乎似出於吾期望
之外

文藻按硯香齋詩集刊本集中山居詩云半嶺通樵
徑柴門古樹遮大聲遙隔水鳥語近依花煮芋添朝

食扶筇看落霞從來軒冕客不到野人家題壁云未
荒三畝宅僻處近城隅歲月留在客江湖老腐儒陶
詩惟咏醉柳谷合名愚春意貧家早
寒梅點綠蕪讀此可想見其高致

江 釧

釧字發秀黃巖人

三台詩話 公客郎聞琴詩云悲風起天末何處更聞
琴况是客中聽誰堪別後吟蕭條孤月色搖落故園心
于載無鍾子悠悠山水音從少陵聞砧脫化結切到琴
最是不然砧笛都可用矣

洪 鍾

鍾字鼎初號鼎臣臨海人

三台詩錄 鼎臣負才名蔣司李鳴玉重之延爲子超
師數奇不遇僅中辛卯副車嘗賦詩云十年鬢向西陵
改一寸腸隨北斗迴亦變徵之聲也著有愁城記及宣
山近詠閩楚紀遊等集

姚啟聖

啟聖字熙之號憂菴山陰人康熙癸卯解元官
至總督加官保尚書

菊坡詩話 憂菴詩有氣岸故覺異樣崢嶸如香山雜
詠云無數艤艫犯海波我來守土竟如何荒城百事移
情少孤島三年轉戰多獻馘樓頭銷鐵角受降城下起

全明詩話
卷五
饒歌彈丸若使勞臣在未許長纓縱尉佗讀之聳聽

按少保當康熙甲寅閩變破家募士戰守仙霞浙東底定迨臺灣之亂衝鋒陷陣雖施琅功然運籌帷幄決勝千里應時以輸軍餉重犒以收士心俾琅用兵多寡出師緩急靡不如意者皆少保之力也劉國軒敗澎湖凱旋煨於海道索撫七日而抵京師少保遣飛騎由內地馳報遲煨二日煨已先封靖海侯矣豈非命哉其生平慷慨仗義揮金如土器度宏遠謀畧過人自藩司晉制府疊著嘉績望重一時又能矜恤文人嘗於各州縣皆多置學田以培寒畯至今閩人德之

任辰旦

辰旦字千之號待菴蕭山人康熙丁未進士官

至兵科給事中

西河詩話

昭華師余時雲間張錫懌有詩云弟子如

蘇蕙先生類馬融余邑任辰旦詩云誰知詠絮堂前女
猶是扶風帳裏人張遠詩云甲門傾國富文華曾向手
長授五車皆指其事餘見余傳是齋受業記 曼殊作
無子自歎詩有桃夭何事不開花句流傳人間其後吳
寶崖贈詩有云天桃莫怪遲遲放應爲人間有曼殊任
黃門輓詩亦云一自夭桃新咏罷奄然不復念關關其
云天桃用本詩也祇關關世多不解是時曼殊好誦毛
詩每日誦三頁後以卧病罷誦故云然亦曼殊狀鐫所
未及者

宋嗣京

嗣京字平玉號定山仁和人康熙丁未進士仕

至饒州知府

雲蘄齋詩話 順治庚子廬陵張公貞生號簣山典試
浙江定山公所取士也詩無刻本僅見之他氏集中有
輓簣山先生詩云抱道如夫子於今得幾人高山符景
行素水洽天真藜閣詩書舊花磚劍佩新文瀾驚走電
筆彩欲生春永叔千秋鑑昌黎八代津芬芬蘭桂集郁
郁李桃陳白簡披鱗領丹心貫日輪身輕浮似葉節重
挺如筠環賜宸恩亟綸宣 帝眷頻蒼生方待澤箕尾
忽遺塵北斗懸終古南軒志未伸哀哉門下士涕泗盡

沾巾

蔡啟傳

啟傳字崑陽德清人康熙庚戌進士殿試一甲
第一官至翰林中允

池北偶談 庚戌狀元蔡崑陽啟傳公車過淮安謁山
陽令邵某邵其鄉人也批其名刺云查明回報蔡怒而
去至京遂狀元及第題一絕於扇寄邵云去冬風雪上
長安舉世誰憐范叔寒寄語山陽賢令尹查名須何榜
頭看蔡後官春坊中允假歸卒

陸隴其

隴其字稼書平湖人康熙庚戌進士官御史諡

清獻

菊坡詩話 詩可言景言情獨不可言理一講道理非
腐卽粗蓋風雅與道學原截然兩途難於牽合也陸稼
書先生題南寨邨佛寺云亦是聰明奇偉人能空萬念
絕纖塵當年可惜生西土未聽尼山講五倫二十八字
足抵韓公原道一篇第於詩之丰韻已蕩然矣余嘗謂
濂洛關閩諸儒惟朱子尚有清新之句雋秀之言其餘
多犯此病

翁 燧

熒字蒼牙號西帆歸安人康熙壬子舉人有見
山樓詩集

國朝兩浙詩鈔 高捷見山樓詩集序畧云西帆幼有
奇氣有大志不樂以經生老時流寇蜂起國是已不可
問欲起而匡維之每過從信宿輒論古今英雄返危爲
安諸偉績不已卽朝突難烟意豁如也西泠沈昂有女
小字琴貞與兄玉亮事後母以孝聞年十五字姚江陳
琪待年四載及請期而壻死女默然不言潛易縞衣久
之媒灼屢來女聞之怏怏抱病未幾增劇父兄問之凄
然曰兒死矣幸毋燬我木兄玉亮曰妹果將同穴乎女

日是在父兄矣越數日卒時年二十有一同郡林璐爲之傳西帆有沈貞女詩云盈盈西泔水遙接華山畿松柏枝相當好鳥比翼飛靜女何瀏瀏蘭房長獨守荇菜參差流許作姚江婦江水日已遠君子逝不返孤鴻中夜鳴靜女腸堪斷旦亦以悲思夕亦以悲思願作雙鴛鴦同穴長不離

徐倬

倬字方虎號蘋村德清人康熙癸丑進士授翰林院編修歷侍講轉國子監司業家居加禮部侍郎

國朝詩話

徐方虎蠶婦曲蠶房新婦嬌紅玉攜籠採

桑初青竹繡襪羅裙踏作泥弱腕并刀切葉齊良夜香
幃體不着身在燈前蠶在箔戴勝纔啼又杜鵑紙窗風
暖正三眠意慵肩膊垂楊柳欲燃青梅懶舉手鏡奩偷
展暗咨嗟眉黃不掃鬢欹斜山頭繭白翁媪喜小姑催
入繰車裏千繰萬繰多苦辛寸絲不挂蠶婦身低聲又
約鄰家女明日沙頭漂絮去極寫勤勞無一字不酸楚
兼能狀輕盈婉孌之態

按水繪園乃如皋冒巢民別墅一時名士咸唱和其
中方虎詩云人憐滄海遠民少話聽開元逸事多極
俯仰流連之致

葉旦

旦字公旦號曉山餘姚人康熙乙卯副貢生寓居德州有曉山詩

國朝兩浙詩鈔 韓坡先生春初遊鄴將卜居塗觀察別墅葉曉山贈之詩云巾車早覓駕轅牛因卜林泉鄴下遊山接終南多隱士澤當彭蠡號中州當窗須有奇峯立遶舍宜尋活水流公若此中營別墅爲儂先置一菟裘

潘沐

沐字新彥仁和人康熙丙辰進士官翰林院編

修

雲蘿齋詩話 沐鷺山七子十六子之一其詩失傳從
西湖志錄得竹枝詞一首云西湖好女白如綿錦塘美
酒青如烟長橋短橋好明月歌入竹枝聲可憐

沈三曾

三曾字尹斌歸安人康熙丙辰進士改庶吉士
授編修終贊善有十梅書屋詩集

浙江通志 三曾居官恭謹恬退不妄交一人 召試
翰詹諸臣限韻賦詩三曾立成恭讀 御製詩一章并
書行楷一幅稱 旨

蔡升元

升元字方麓德清人康熙壬戌進士及第第一

歷官禮部尚書

湯右曾紀恩詩序

方麓紀恩之什皆含英羣籍矢音

六義麗以則清以越言暢意靈而於祝嘏之詞尤工

許汝霖

汝霖原名汝龍號時菴海寧人康熙壬戌進士

選庶常歷贊善累遷至禮部尚書 予告歸里

有德星堂集

浙江通志

汝霖督學江左考試事竣輒置酒君山大

會諸生布席分題或詩或賦各展所長至今傳爲盛事
文藻按時菴送楊自西少司馬終養歸里有詩云銅
柱留名紀壯猷翩然綵服放扁舟兩朝養望儲黃髮
八座辭榮奉白頭客久誰無歸里夢官高偏忘
倚門憂先生愛日情何限手毫咳蘭進饒羞

吳寶厓

寶厓仁和人康熙進士官荏平縣知縣

漁洋詩話 余有寄懷錢唐吳寶厓二絕句云競說仙

人萼綠華紫金跳脫降羊家苧蘿溪上青無主一代紅
顏獨浣紗紫陌紛紛看牡丹車如流水從金鞍那知冰
雪西溪路猶有梅花耐歲寒寶厓因屬禹尚基之鼎寫
西溪梅雪圖

蓮坡詩話 余舊與朝勿齋談半村吳寶厓同作小遊
仙詩寶厓一絕最佳自整花冠向鏡臺天衣稱體不須
裁呼童特地除松逕曾訂雲英早晚來

槐塘詩話 錢唐錢石臣肇修康熙辛未進士入籍遼
左撰盛京竹枝詞百首述 昭代之遺聞訪先朝之軼
事間以里談雜之諧謔吳寶厓題其集尾曰關外新城
細柳營忽聞才子蹋歌聲向來吹笛人休怨今日春風
滿舊京遼后遺詞未是才文姬舊拍太多哀臙脂山下
臙脂女解撥琵琶按譜來

高士奇

士奇字澹人號江村錢唐人以書法稱 旨注

翰林官至禮部侍郎兼學士卒諡文恪

西河詩話 上幸喜峯口有過黃土崖大石磯 御製

二詩扈從高侍講依韻奉和予在史館時竊記其黃土
崖一詩曰黃崖天外削碧樹半空懸徑絕遲歸鳥山空
聚午煙北來千嶂密西去一關偏萬乘披襟處風回百
尺巔 山西五臺山下大溪有虎能傷人 上於康熙
二十二年二月幸五臺還適虎伏溪旁灌莽間 上援
弓射之立斃山西巡撫穆爾賽按察使庫爾康謂此虎
爲民害甚久 上除之因立石道旁請題其溪爲射虎

川按江村扈從錄載 上射虎不一曾在樺皮山射三
虎皇太子九歲亦射一虎始知史稱李廣射虎事矜張
滿札真卑卑也後於連希喀布齊爾口及烏蘭布爾哈
蘇及西爾哈河較獵連射四虎旣晚至帳殿侍衛報夜
分有虎竊營間驪馬去至前山林下食尚未半 上親
往射殫之江村作射虎行記其事其詞曰 皇輿蕩蕩
界蒙古玉輦時巡歷茲土迴岡巨壑叢棘多陰森林木
不知午千騎萬乘排空來夜張行殿山之鳴月上忽聞
羣馬驚傳道前山出猛虎曉看一馬果摧折血肉淋漓
去兩股 龍鑣飛控陟層崖禁林衛士挾弓弩搜巖剔

數無幾時一箭橫胸洞肺腑這人手額復戰栗踣言此
虎爲患苦道旁白日每捕人傷殘行旅莫可數幸茲惡
劣得翦除當代 君王果神武從來射虎多耳聞何似
臣今得目睹因嘆蠢頑本不靈貪饕無厭乃自取不然
長林茂草間餐眠何畏施網罟殺人安人王者心卽此
推之澤應普按東巡扈從雜記詩有云曠野春深日馭
遲獵場近遠奏先知註較獵時先遣侍衛看定獵場前
一夕書綠頭籤奏明旋晨清蹕齊分隊薄暮安營各認
旂註我 朝行圍講武使其習熟弓馬諳練隊伍每獵
則以隨 駕軍密布四圍旗色八部各以章京主之分

左右翼馳山谷間逾高降深名曰圍場惟視藍旗所向
以爲分合有斷續不整者卽以軍法治之章京服色亦
隨本旗惟御前侍衛及內大臣得穿黃褶子行圍之
法以鑲黃旗大纛居中聖駕居纛前按轡徐行兩翼
門纛相遇則立而不動以俟後隊漸次逼近謂之合圍
及圍蹙則狐兔麋鹿竄足圍間惟上及皇太子得
隨意縱射若親王大臣近侍非受旨不敢發矢但獸
有突圍者則扈從諸人許捕之飛鞚金銜馳狗監離條
綉帽脫鷹師註凡圍中鷹犬各專官主之犬以朱纓金
環飾其頂牽者繫綫於足見獸則出蹶縱之鷹以綉花

錦帽蒙其目，擎者綰條於手。見禽乃却帽，放之新翻艷。
譜天鵝曲，偏向園中靜。夜吹註旌門，鐃吹多奏海提天。
鵝曲

蓮坡詩話 高文恪士奇有題人小像詩云：密林陡壑，
四明山聞有幽人，自往還一卷奇書。琴一曲，儘堪消受。
此中間又寄懷友人句有：君向水雲開竹塢，我從圖畫
認江村。如吞綠水吐白雲，當極盛時已有悠然物外之
想。狄向濤蔣少京刻其苑西集。

吳越所見書畫錄 康熙壬申臘之廿五日，天氣晴和，
春光日近，獨坐瓶廬，觀馬文壁幽居圖，偶和錢曲江韻。

不撫瑤琴不奕碁晴窗暗覺斗星移出門無侶居無伴
圖尾閒題歲晚詩竹窗高士奇

王丹林

丹林字赤抒號野航錢唐人中書舍人著有野

航集

王野航墓誌

章撫
功撰

君諱丹林字赤抒號野航姓王氏

生十二歲而孤十五歲補郡弟子又五年而餽餽十年
而中明經選踰三年試爲教習又四年官中書科又八
年而以疾歸君刻意爲詩歲目鉅心鏤詞琢句遂入晚
唐人之室其輕新婉麗有方城之風而才俊似過樊川

一時僚友之能詩者共集爲消寒雅會而君實爲之冠
君又善書雖其短章醉墨畫幀題識落筆爭爲人傳誦
故君之歸也大司寇新城王公贈以詩有今朝鳳池客
又泛五湖舟尚有文園病能忘鄴下游之句而高文恪
亦贈言云豈獨文章貴還推器識全云云野航詩集十
卷文集如干卷彙率集一卷君配孺人陸氏君卒年才
五十有一孺人後君六年卒生子三長宸儔國學生次
宸偉又次宸倬

國朝詩錄 野航詩品在牧之飛卿間羈留日下諸鉅
公交口推重方欲薦揚明廷而中道摧折詩之鐫刻者

亦少藝林至今想望之

雲獲齋詩話 中翰在京時有白桃花詩流水有情空
蘸影春風無色最銷魂刻劃盡致巧而不纖宜當日長
安諸公推爲絕唱爭相傳寫焉

炙硯瑣談 錢塘王舍人赤杼丹林悼亡妹云急雪罷
吟簷外絮大雷空寄袖中書沈歸愚激賞此聯謂道韞
詠雪明遠寄書實事死事也用罷吟空寄四字則虛且
活矣按此公論詩多學究語試問題係悼妹若泛引二
事豈復著題奈何以尋常運筆詫爲指授金針也

謝國隆

國隆字綦甫號復旦太平人

三台詩錄 復旦端方有操鄉里重之嘗聘修邑志同
事紀載失實毅然辭去賦詩有佳傳肯同陳壽作穢書
嫌似魏收成及步兵有酒皆成醉道士無鵝亦寫經之
句至今傳美

龔翔麟

翔麟字天石一字衡圃仁和人以副榜入仕至
監察御史有田居詩稿

沈名蓀龔翔麟傳 翔麟所著田居詩稿十二卷出入
六季三唐而要其宿於眉山蘇氏詞以石帚爲宗旁及

於梅溪玉田蛻巖諸家之體自少卽與秀水朱彝尊李
良年李符平湖沈日華沈覃九齊稱號曰浙西六子

許君徵

君徵字川九號雲怡天台人

三台詩錄 雲怡與弟君羅俱以詩著有楓林雜詠以
明經終嘗賦採香涇云誰識苧蘿村上女却驅麋鹿上
蘇臺爲時所重然過尖新非詩家上乘也

陳奕禧

奕禧字子文又字六兼號香泉海寧人由貢生
官安邑丞入爲戶部郎出知石阡府改南安知

府

居易錄 門人陳奕禧子文海寧人善爲詩尤工鍾王
書法以太學上舍仕爲安邑丞著皋蘭載筆益州子役
記十餘卷詩格尤進如斜日一川沂水北秋山萬點益
門西之句不媿古人

漁洋詩話 門人陳子文自黔南歸補南安太守未幾
病卒蔣靜山仁錫嘏之云己亡飛鳥驚蛇蹟又失嶽崎
歷落人子文書法名當代人尤豪雋余方欲作哀輓見
靜山詩遂爲擱筆

見聞隨錄 陳香泉工書法授安邑丞遷知深澤縣其

在京師日有陸某亦以書法名同里尊行也香泉贈詩
曰借問如何是撥鐙陸見詩甚恚及遷令有大吏頗以
能詩自矜王阮亭士正與查德尹嗣琛同在京邸查謂
定相水乳阮亭笑曰信然特不可獻詩問撥鐙法耳台
座粲然後累官至南安府知府

蓮坡詩話 海寧陳香泉太守奕禧書法名天下詩格
更高有潮縣阻風句云風傳冷樹飛霜葉雁宿秋江老
白蘋風味不讓唐人漁洋謂邢太僕徐庾文章建安體
悔教書法掩詩名可以移贈

梓字文開仁和人

國朝詩錄 戴文開佐康親王平三逆有功王假以監
軍道職後因能詩 命直南書房剛直不阿受其挫者
共倚撫之徙瀋陽詩挺勁有力謫戍後尤佳其出獄口
占云已解析楊困旋增離別傷逕憑南去雁不死慰高
堂烽臺晚眺云獨立俯荒邱清笳殷戍樓萬山環塞險
一海抱天流白骨何年戰黃雲終古愁憑高無限感霜
月滿征裘塞外逢子先上人云鄉語忽驚聞相看是故
人龍庭二十載不識故園春

楊雍建

雍正字自西海寧人官至兵部侍郎

恩假省覲送行詩冊

節錄

從曾祖少司空岷瞻公康熙

庚戌捷南宮臚傳第二人丙辰由侍讀學士請假歸覲
賦詩詞送行者盡屬巨卿名宿霖得此藏弄已四十載
冊中楊少司馬詩云上林詞賦早知名玉殿風高講幄
清忽望白雲懷雪水暫辭丹陛向南征歸思不爲秋萼
興省覲寧誇書錦榮宸眷日殷需啟沃相期蚤晚入
承明

吳越所見書畫錄

惲南田諸名賢棟亭詩畫卷九個

棟亭賦序云司空曹公開府東冶手植棟樹於署之野

爰構草亭闌干相亞言命二子讀書其下夏日冬夜斷
斷如也我公卽世典型徂謝 上詔長君嗣服官舍攀
條流涕追思逝者繪圖在右陳詩在左揭來吳門卷冊
盈把宋犖詩序云子翁之尊大人於白門使院手植棟
樹數株綠蔭紛披可愛因作亭其間顏曰棟亭子翁追
念手澤屬諸名人賦之詩盈帙矣未幾子翁復移節白
門十年之間父子相繼持節一時士大夫傳其盛事楊
雍建題詩云平陽姓氏重江鄉父子同官世澤長已信
皇猷誇黼黻重開袞職煥衣裳高亭遺愛皆堪思老
餘開花到處香我亦有心歌盛事詩成聊以寓甘棠

張陞

陞字登子號小隱山陰人官福建延平府同知
國朝詩話 山陰張登子陞經雁門關詩重關高峻勢
嵯峨傑閣天開有雁過六月寒風吹客袂三春衰柳徧
山坡泉從絕頂分溪澗雲到中峰隱薜蘿每憶當年邊
戍苦烽煙無警荷戈多全首熨貼結語尤振

滑彬

彬字又彬號魯齋仁和人康熙壬子拔貢知輝
溫二縣

湖墅詩鈔 魯齋居官有循政年祿傾產代民輸糧其

詩格亦雄健九日詩云策杖獨登臺飄零濁酒杯花黃
迎序發雁白背風哀北嶺孤烟直東湖曙色開離憂已
無際落木不須催

李鳳雛

鳳雛字紫翔東陽人由貢生補教習選曲江令

金華詩錄

梧岡詩集惟呼濁酒澆狂客自喜霜螯勝

熱官原注其恭飲余酒方擘蟹閤者報有八座拜其恭
叱曰不以八座易八脚飲啖自若後輓其恭詩云揮成
一賦千金易持得雙螯八座輕亦指此又云司馬何人
藏諫草中郎有女讀遺書注云其恭感懷詩瘦妻多病

常思毋嬌女能詩未字人

沈起雷

起雷字平萬原名隆峴號白門平湖人由貢生授訓導職有草廬稿

國朝兩浙詩鈔 沈白門少與趙佃陸棻陸埜沈皞日陸世枻陸來章輩稱當湖七子有送翰周詩云總是淹留客相逢傾蓋交門樽當畫閣極目俯寒郊朔雪消河曲明星出柳梢田園蕪欲盡歸興起誅茅

沈崧

崧字涵中號古民平湖人歲貢生授訓導

國朝兩浙詩鈔 沈古民年十二以神童入學自順治
戊子入場至康熙戊子花甲一周壬子己定解元以第
二場誤字被落著述多而無遺稿縣志多出其手詩有
題畫二首雲林小像云韻致唐人晉人風流畫史詩史
別載元代衣巾留到明時甲子梅道人筆云信手披圖
弄墨相看得意忘言添波便爲淇水疊石真成顧園

嚴啟煜

啟煜字玖林號夢灘歸安人官永康訓導

國朝詩錄 玖林嘗言昌黎昌谷雖非詩之極至然針
砭庸熟廓清之功真乃比於武事又言二昌乃吾死友

今披其集皆和平中正無詰屈奇詭之習豈善學者不求形似耶

毛奇齡

奇齡字于一名牲字大可號初晴又號西河蕭山人康熙己未以博學宏詞召試授翰林

檢討

國朝詩話 毛西河說經長於辨駁文體長於序事雖以攻紫陽蒙垢實一代才也詩擬唐人意在矯前人推重宋元之枉議者目爲唐皮予按絢爛有餘但未歸平淡耳飲馬城邊曲二絕燕臺北望薊城山飲馬城邊驅

馬還前度錦車休出塞將軍近在草橋關城邊飲馬莫
辭還將採燕山二月花日在陣前誰敢敵薊門關外盡
風沙却類高岑他如五言絕句楓落林暫紅草疎路微
白牆低落澗光門靜入山色寫景頗會入微五字三韻
體中種蔬逢好雨送客在殘陽山色門邊起江聲城外
來五言律中林深無犬吠一任亂鶯啼盤溪三十度總
在碧雲中等句則天然超妙非粉飾也總之漢魏六朝
三唐宋元必難禁其互相消長於天地間隨體別裁隨
時挽救自在識者過分門戶皆失平心

瀨中集

王亦退曰西河五律有目前語如紅竿隱寺

樓平田千蝶舞類有畫語如雲隙流天影人家斜照裏
類有理會語如山空收霧早月沈燈影動類有驚人語
如伊闕黃河湧虎過草頭風類有可思語如繁條抽野
館燭墜舞衣前如海日連雲起亦是驚人語畫語 劉
勃安謂西河鳥啼懷故國馬首戀鄉人善寫人情槿花
看午落菱蒂及秋生工杼物理

國朝名家詩鈔小傳 毛奇齡少負才縱橫爲詩歌古
文又好臧否人物意稍不合卽不稍假顏色間效元人
作小詞雜曲以自娛怨家摘其語以爲訕謗按驗無實
得不坐旣而之齊之楚之鄭衛梁燕重門複壁曼嘯長

吟往往託之美人香草以寫其幽思過淮陰於張吏部
園亭倚醉叩槃賦明河篇六百餘言及旦則城中鈔寫
殆遍又嘗遊飲禹州楊花飛飛望署後白雲樓泣下作
歌匝月而都下之妓館酒樓競相傳唱皆其生平之佳
語也爲詩近萬首嘗自言酬應者十九宴遊者十一登
臨感寄無聞焉工拙概可知矣生平絕不喜東坡詩謂
其詞繁意盡去風騷之義遠一日者汪主事蛟門舉竹
外桃花三兩枝春江水暖鴨先知之句相難謂此等詩
亦得云不佳耶遽怫然曰驚詎便後知耶獨尊鴨也衆
爲捧腹然西河實能以雋骨幹艷彩莊而不重宕而不

恍令人於千載後重見神龍景雲風度始寧女士徐昭
華讀西河瀨中集而感歎願受學稱都講焉都講蓋高
弟子之稱名云

全閩詩話 毛西河答黃俞邵詩二首云黃金高築不
曾逢敢道才高氣似龍客路經年乘下澤官齋卧日到
高春王通家有三株樹和嶠身如千丈松何幸臺城重
會合秋宵一聽景陽鐘虛傳往日賦明河十載長淮未
放舸秋盡論詩逢沈約年來講易共田何龍江雨過低
紅蓼牛首看雲捫綠蘿建業重逢愁思遠敢言對酒不
當歌按原詩云麗藻清詞鄴下逢西湖才子氣如龍頃

年變姓嘗爲客是處移家欲賃春又云明河詠罷添愁
思故有賦明河及氣似龍句明河篇卽淮陰所作者一
時傳誦人口見七古卷

畫漁餘話 康熙初毛西河太史席上贈伎詩云雙瞳
夜翦巴江雨一笑春生揚子潮凡形容麗人者當無勝
此一聯矣特次句所云揚子潮人多失解予以爲此乃
狀笑容非狀笑聲也緣揚子江心獨有水渦而笑靨亦
能生渦若作笑聲解則此一笑竟如鯨鐘鞳鞳鼉鼓砰
訇聞者方掩耳驚走之不遑何以惑陽城而迷下蔡耶
菊坡詩話 西河先生西施廟云浦口西施廟蕭蕭竹

映門越王山下路寂寂草蘿村紅粉溝頭水青苔石上
鬼夜來餘里婦燈燭伴黃昏上四句是做鄭都官昔年
共照松溪影松折碑荒僧已無今日還思錦城事雪消
花謝夢如何四句而稍爲變化不對得十分工緻耳然
畢竟是隔句對法亦名爲扇對

按西河先生集以散體文爲最其長篇叙事尤得龍
門神髓辨駁經義頗以捷給爲能殊乏儒者氣象當
次之詩又次之然先生却以經術自負而所作詩詞
亦流播甚遠嘗有琉球使者過抗覓買瀨中集并訪
見先生故先生懸一聯曰千秋經術留天地萬里靈
方識姓名蓋先生所自作而假名於門生某者也余
幼時猶見此聯書法亦佳先生凡作詩古文必先羅
書滿前考核精細纔伸紙疾書其夫人陳氏以先生
有妾曼殊性如悍輒詈於人前曰爾輩以毛大可爲
博學耶渠作七言八句亦必懶祭乃成先生笑曰動

筆一次展卷一回則典故純熟終身不忘日積月累自然博洽後生小子幸徵予爲之婦言勿聽也又嘗就居矮屋三間左列圖史右住夫人而中爲會客之所先生構思詩文手不停筆質問之士環坐於旁墮問隨答井井無一誤夫人在室中更詈罵不絕口先生復還詬之殆五官並用者聰明之資一時無兩余先祖月山公與先生交善相處最久因爲予言如此又按先生之文簡鍊處得力龍門雖快處脫胎國策皆活虎生龍無平衍之病今西河合集中有墓誌傳序十餘篇絕不類先生手筆蓋其集鱗行在先生歿後疑卽編次諸人欲表揚其祖父以僞作雜刻其中藉垂不朽識者細爲辨察應當眞贗瞭然又按先生同時蕭山包秉德沈禹錫蔡仲光皆淹貫博洽一時有包毛沈蔡之稱逮其後三人皆以諸生老死惟西河之名徧天下而海內人竟無有知三人之能文好學者雖先生妙筆天授亦可見科名限人而以耳爲目者蓋亦有之悲夫

朱彝尊

彞尊字錫鬯號竹垞秀水人康熙己未以博學

鴻詞徵試授檢討充起居注日講官

鴛鴦湖櫂歌注

陸龜蒙和女墳湖詩云應是離魂雙

不得至今沙上少鴛鴦此云自從湖有鴛鴦目水鳥飛
來定是雙觸景生情不必實有其事 鴨餛飩小漉微

鹽自注方回題竹枝詩跳上岸頭須記取秀州門外鴨

餛飩嘉興縣志浙東用火哺蛋其未成者嘉興用香鹽

炮之名喜蛋傳爲春月佳咏 曲罷殘陽人不見陰陰

桑柘石門青自注石門春秋吳壘石以拒越錢起詩曲

終人不見江上數峯青按徐禎卿嘉禾道中詩云門水

來天目看桑過石門俞右吉曰道吾鄉風景者多矣方
萬里出戶卽乘船徐昌穀看桑過石門語似淺而實切
今讀先生此詩覺石門真景更描寫曲盡矣

西河詩話 予請十旬假同官餞予於沙河門外皆有
詩獨朱竹垞賦長律二十四韻有云曉雨千門散新泉
五牖聞花光晴淡施峯翠遠氤氲祖席移帆影回塘蹙
水紋語多兼往事觴罷判斜曛此卽事也至語多兼往
事起一句遂有云午爨柯亭竹秋眠蕙帳收則叙余鄉
遊時事失路棲淮浦逃名憶汝墳則叙予出走時事易
穿東郭履難免北山文則叙予應 召時事香奩詞悵

悵錦瑟淚紛紛則叙余亡妾時事爲折章臺柳翻辭秘
省芸則叙予歸來時事此皆貽贈之最親切者自非竹
垞焉能知我若是予嘗品竹垞長律可凌駕元白卽此
可驗其全見本集

漁洋詩話 朱竹垞著書最富如日下舊聞經籍存亡
考皆餘百卷又撰詩綜詞綜若干卷其自著詩歌雜文
曰竹垞文類者予爲序之尤愛其少時永嘉諸詩如南
亭云薄雲雨初霽返照南亭夕如逢秋水生我亦西歸
客西射堂云已見官梅落還聞谷鳥啼愁人芳草色綠
通射堂西孤嶼云孤嶼題詩處中川激亂流相看風色

暮未可纜輕舟吳橋港云聞說吳橋港荷花百里開當年王內史五月權船回瞿谿云鳥驚山月落樹靜谿風緩法鼓響空林已有山僧飯飲吳郎宅云吳郎愛客解千齡勸飲青絲挈玉餅落日兒童齊拍手過江三日幾曾醒祁六座上逢沈五云東陽年少沈休文五載相思兩地分今日謝家羣從在青綾帳外更逢君

居易錄 門人嘉善魏坤禹平持水村圖求題予爲作絕句云云朱竹垞詩云綠蘋不碍板橋樁紅葉常堆老樹腔他日相逢任風雨拙帆直到讀書窗又跋云通川錢德均居魏塘趙承旨爲作水村圖予嘗見其真蹟信

墨寶也禹平以水村自號吳江徐虹亭檢討亦爲作水
村圖予題之云鷗波亭子趙王孫曾爲錢郎畫水村過
眼雲烟難再覩披圖彷彿筆蹤存斜插魚標颺酒旗柳
陰小犬吠笆籬歸田最是汾湖好我亦相期作釣師旣
而禹平復至京師屬李南溪上舍又作此卷按德均當
日亦有二圖承旨作之於前薊邱李息齋爲之於後何
古今人事之相類也

池北偶談 昔見朱竹垞檢討詩云捉卧甕人選新格
初不解及觀通志有趙昌言捉卧甕人格及採珠局格
旋綦格金龍戲水格等名始悟所語

山居詩話

朱竹垞駕湖棹歌自從湖有鴛鴦目水鳥

飛來定自雙定字煞得妙一葉舟穿粧閣底傾脂河畔
落花多兩岸新苗纔過雨夕陽溝水響溪田真箇肖元
人絕句卽舟愛向斜塘去妾意終憐長水長從斜字長
字着想便覺雋永坊名百福圩號千金俗矣乃出之小
婦之口與論家計云勸君百福坊南宅多買千金圩上
田卽化俗爲雅反增韻致半邏訛爲半路云隨卽盡日
鹽官去莫漫將儂半邏拋卽劉賓客道是無晴却有晴
樂府隱語本來遺法也桃花落後蠶齊浴竹筍抽時燕
便來青粉牆低望裏遙紅泥亭子柳千條三過堂東開

夕照滿村黃葉一僧歸當暑黃鸝鳴灌木經冬紅葉映
斜曛不須台路尋魚鮓但向分湖問蟹胥對偶極工緻
着色極雅麗至都緣世上錢神貴地下劉伶改姓金則
神巧不可言喻矣

國朝詩話 平湖陸稼書先生真儒也朱竹垞有詩寄
之云主恩先後逐臣還羨爾幽棲洲一灣想得著書風
幔底桂花如霰落秋山下二句狀其蕭然自得之致
國朝名家詩鈔小傳 朱彝尊號竹垞童卯之時即便
工詩年十七作贅壻於嘉興馮氏馮公有客王鹿柴者
華亭名宿也一見大奇之曰此必以詩名世自後詩名

藉甚人口時阮亭尚書以風雅號召海宇一時名流無
敢相驂驪者濟河海岱間每以山礪田氏並舉而言而
江南人士亦有漁洋綿津二家詩之刻此皆出於鄉曲
之談門下士阿私之論附影隨聲不可爲典要惟先生
體大思精牢籠萬有而澄汰鍛鍊不肯人云亦云若以
匹敵正如玉溪生所云彼若陳葛天氏之舞此乃引穆
天子之歌彼若言太華三峯此必曰潯陽九派者迄今
交遊零落壇坫荒涼而新城長水屹然爲南北二大宗
師比於唐之李杜宋之蘇黃更千百年而勿之有改也
嗚呼盛矣

雲螭齋詩話

周大崧層巖往來崑山諳曉音律嘗語

吳伶曰今之戲曲天下謂之崑腔始於梁伯龍而伯龍本之太倉魏良輔凡唱一調必先知腔之緩急然有緩之中嘗接以急急之中嘗接以緩神而明之存乎其人竹垞先生有寄語紅窗休度曲隔船回顧有周郎之句前輩使事之切非僅以其姓氏之偶合

柚堂筆談

焦山瘞鶴銘或以爲陶隱居或以爲顧逋

翁亭林云余於崖上得唐人詩詩在貞觀中已列銘後則銘非顧况明矣考銘字體與舊館壇碑正同其爲隱居無疑淮陰張力臣辨定以爲顧逋翁書

本歐公之說

竹垞

先生跋云逋翁學道句曲遂移居於此集中有王郎中
見贈琴鶴詩鶴殆出於性所好斯瘞之在銘理有然者
然先生爲王副使題焦山剔銘圖詩云審視要非唐後
勒昔年曾與張昭論則亦未以逋翁之說爲是矣 詩
人得句興到偶然相同不必定以襲故爲嫌如東坡李
世南圖云浩歌一擢歸何處家在江南黃葉村曹松隱
題張太尉畫云輕舟急漿歸何處應住山前黃葉村何
大復盤屋清明云獨樹桃花自發高樓燕子誰家可惜
年年春色催人白髮天涯竹垞先生蓬萊閣晚望云源
水桃花樹樹春風燕子家家目斷江南歸思愁人不在

天涯汪堯峯句云溪水碧於前渡日桃花紅似去年人
崔不雕句云溪水碧於前渡日桃花紅似去年時 竹
垞先生題周恭肅畫中云記得濫溪西去路荻花楓葉
淺沙灣按濫溪周氏之族聚焉濫本音爛言溪光爛爛
也有平去二聲陸魯望迎潮詞云江霜嚴號楓葉丹潮
聲高兮墟落寒鷗巢早兮漁箔短遠岸沒兮光爛爛韓
昌黎江漢詩云淒風結衝波孤裘能禦寒終宵處幽室
華燭光爛爛皆與寒字叶今廣韻二十五寒內爛字不
收 自從前度黃河決董口填淤駱馬過夫柳至今喧
里巷客帆終覺厭風波東南民力愁先竭西北源泉棄

尚多安得歲星長守越年年挽粟上盤渦此竹垞先生
於康熙八年過駱馬湖作也前年河決桃源黃家嘴董
家溝口淤塞舟皆由駱馬湖行汪洋巨浸之中蓋時旱
河中河皆未開也又康熙二十年始令官種柳以備堤
埽之用前此皆賦之民故靳文襄築清水潭決口記云
十五年尚書莫如錫勘問所司佑帑五十七萬而夫柳
仍派於民間今觀先生此詩真詩史矣後半含蓄不盡
神似少陵

彭孫遹

孫遹字駿孫號羨門海鹽人順治己亥進士授

內閣中書康熙己未以博學鴻詞第一授編修
累官吏部侍郎兼翰林學士有柏悅堂集

漁洋詩話

南昌重建滕王閣落成名流競爲賦詩推

彭少宰羨門擅場中聯云依然極浦生秋水終古寒潮
送夕陽余嘗喜諷詠之謂劉文房郎君曾無以過也彭
又題湖口云湖光盡日依樓堞山色終朝滿縣城亦是
寫照

池北偶談

南州滕王閣毀於金聲桓之亂順治中蔡

尚書士英開府江右重新之海內名流多賦詩惟海鹽
彭羨門擅場其警句云依然極浦生秋水終古寒潮送

夕陽 昔人謂竹枝歌詞雖鄙俚尚有三緯遺意近見
彭縣通嶺南竹枝深得古意詩云木綿花上鷓鴣啼木
綿花下牽郎衣欲行未行不忍別落紅沒盡郎馬蹄妾
家溪口小迴塘茆屋藤扉蠟粉牆記取榕陰最深處閒
時來過喫檳榔半年水宿半山居冬採香根夏採珠珠
好須從蚌中覓香燒還仗博山爐又山陰徐緘竹枝云
勾踐城南春水生水中鬪鴨自呼名伯勞飛遲燕飛疾
郎入城時儂出城亦本色語也

居易錄 吾友彭少宰羨門孫適以康熙丁丑假歸己
卯九月率子姓姪甥輩登秦駐山賦詩云平生幾兩中

郎履更不登臨奈老何明年庚辰重九後遂下世殆識也

按康熙戊午開博學宏詞科羨門以大學士吳正治所薦明年上於體仁閣考試親定甲乙中五十人入史館充纂修明史之職以羨門爲第一羨門工詩詞與新城王阮亭齊名時有彭王之稱嘗步蕭寺詩僧方製琉璃長明燈請爲賦羨門諾之僧退煮茗以餉若未熟而賦就矣其筆端敏捷類如此